

四庫全書

集部

欽定四庫全書

集部
泊菴集卷六

詳校官檢討_臣羅國俊

中書_臣劉源溥覆勘

總校官編修_臣王燕緒

校對官編修_臣嚴福

謄錄監生_臣謝雲

欽定四庫全書

泊菴集卷六

序

明 梁潛 撰

送鄒太府詩序

中書舍人鄒君尚友以母憂去官既服闋改蜀之資縣
令其友翰林侍講楊君士奇暨左春坊中允尹君昌隆
皆賦詩餞之以予嘗教於蜀蜀之故宜知之屬為序尚

友蓋溫厚而信恭守其身約其行無毫髮失意於人而接於人者亦無毫髮拂乎其中也皇上紹登大寶嘉靖萬邦天封勲臣稽舊章定程式惟是二三文詞之臣尚友克宣乃力益勤弗懈蓋尚友在中書也久習於故事他人所未知知之而未盡者尚友言之輒有所依據非苟然者夫百里之令得尚友為之誠無難也然治其民而為之防範禁制非素知朝廷之先後緩急者有未易能之若尚友於國家深計遠圖皆已知之熟矣而資又

小邦其俗朴厚一令行而翕爾從一牒追而遽然至尚
友卧治之足矣於禁制防範施為先後緩急夫何難也
若夫登臨山川之壯以宏放自恣肆其情於文辭寓其
言於簡札則尚友得於為政之外者予不能知也然朝
之士莫不真尚友之還也則吾知其不能久於其任矣
送丁行人出使占城序

皇帝入紹大統幾二載功化弘溥至和薰暢禎祥輯臻
騶虞神龜嘉禾野繭進於闕下者不可殫紀內治既隆

外化益彰於是瓜哇日本琉球三佛齊西洋瑣里諸國
皆聞風咏息文犀白象玳瑁珠璣之屬獻於庭者無虛
日既而皇帝若曰凡天地覆載之內皆朕赤子也其往
撫其君以綏其民惟是二三大臣受命惟謹乃簡廷臣
之賢且材者次第以俟惟占城在海外萬里乃命行人
丁蕙往蕙頓首受辭闕下不俟卜日輒往就道衣綉衣
持使節策馬出都門外親知故人觀者皆辟易道路惟
恐褻天子之使亦壯矣哉昔漢之初年婁敬陸賈皆嘗

奉天子命出使外國然其時高帝方平秦天下新定匈奴外夷皆強盛不可制以文法高帝惟羈縻之而已初未嘗若今赫然南面使之奔走僕僕也而敬等於其時徒以口舌折之亦難矣蕙是行占城君長方將率其臣子再拜郊迎而其羣屬首領驚悸駭愕望塵而疾趨炎海之涯樓櫓所蒞真若自天而下也其視敬等相去蓋萬萬不同矣予忝職史官方覩國家隆平之盛而又竊嘆蕙之遭遇其時也遂序以贈之

徐伯貞字序

國子祭酒都陽徐先生冢嗣恒以年當冠先生稽諸禮
冠之冠已字之曰伯貞先生以予嘗同官屬為序以勗
夫恒之志俾有以進於道於乎甚矣先生之愛其子也
夫恒之義在久于其道也故恒卦之繫曰利貞利有攸
往貞正也恒而不以正非其道也非其道而守之堅固
而不知改移變易以求適於正其不為淫邪頗僻小人
之歸者鮮矣夫聖人之道萬世而不可易者正也自洒

掃應對至於窮理盡性齊家治國平天下之大舍之而
他求則為老佛之妄管商之詐儀秦之縱橫舍乎此入
乎彼去乎其正即乎其不正者皆黜於聖人者也先生
之意在此故有以名其子而字之愛其子者至矣傳曰
愛子教之以義方弗納於邪其先生之謂歟於乎古之
人自胎教至於成人所以習而化之者靡不有法故人
之生而為正人端士之歸也易後世之為父兄者不知
所以為教決堤潰防而求其免於泛濫橫溢亦難矣恒

其勉之

送陳大尹序

泰和陳君善方自壯歲取科第事太祖高皇帝為戶部主事既罷去復起為海寧令尋以憂去服闋授江陵令或者曰江陵煩郡善方性簡易以簡易之性居煩劇之地竊為善方病之善方行有以其說告予者吾與善方友素知善方多技能喜行書又工於為畫興到取片紙寫山水雲煙皆有遠意彈琴賦詩至夜忘倦又喜任俠

馳奔堤走峻坂彎弓命中以為笑樂人人喜善方之能也善方亦以是自快於己豈以豪邁之氣伏而不施或於是焉發之耶抑情滋於中不能自抑所謂玩物適情者其在此耶此予之所以病之而人固謂善方簡且易也然則善方暫已乎其外以一乎其內豈不可哉昔劉昆之治有異績號稱長者史氏謂其為政簡易不知昆所謂簡易者誠有同於善方今之所云乎哉然善方敏於為政博通古今知所以愛其民恐予病之者或不足以

病善方也書以告之

五峯堂詩序

臨川程伯成讀書好禮重於鄉閭遂以多貲選歷事於
天官以其家五峯之下名其堂曰五峯士大夫為歌咏
之積成帙因求予文序之伯成臨川鉅族也其高祖楚
國文憲公鉅夫以雄才碩望受知元太祖高皇帝一時
羣公卿士多出其門而伯成之尊父又嘗司征於臨川
衣冠世澤亦盛矣伯成未仕時優游乎峯之下草衣木

履望青雲而招五老其一時雅曠之趣豈不與五峯相
高哉而諸公所為歌咏稱美則又自伯成在天官時居
多夫往來於天官者天下士也以天下士而為之歌咏
未易得者而伯成得之焉於是乎五峯之勝與伯成之
趣益並高矣而文憲之流澤豈有艾哉然而君子立身
行已必自致其力而後可以不朽則夫五峯之勝固有
在於伯成而不在此也詩曰無念爾祖聿修厥德伯成
其以之

送王紀善詩序

皇明統一萬邦堪輿之廣曠古所無乃稽古隆建周親
以大屏王室其王府僚屬尤慎簡拔蓋以宗社翰屏之
勢默繫乎王國之重而凡王之仁明忠孝文武慈愛又
繫乎其僚屬之盡其心也然官於是者必廉威自重素
有譽望者乃能行其道而知其任職之重如此予自來
京師獲交魯府紀善王可貞先生先生問學切實通乎
古今之與達乎物理之宜而恬澹安雅未嘗有毫髮慕

乎其外之心其行於家教於下信於友者又未嘗一日肆也故其鄉黨故舊識與不識皆知敬慕王先生聞其名而畏服之先生非所謂廉威自重而素有譽望者哉君子仕於朝與仕於王之國其爲道不二其受命於君以食夫祿一也惟無所慕於外則可行其道無所枉於己則可以正乎人而凡有所憚而不敢肆有所畏而不敢發者亦惟察其心之無所事乎利而守之素嚴義之素著不可以威奪而勢驅故屹然中立不動聲色而邪

佞自然消沮也吾求其人而未之見焉乃今見之矣豈
不深可喜哉自今以往聞有仕乎王國而能行其道勝
其任者必先生也先生將隨王之國一時交友即其所
之道路所經山川之勝自京師而抵於魯分為題賦詩
以餞之得若干首以予辱交先生而又知之深也俾為
之序

靜學齋序

予在禁林七年得交游之士二人焉烏江蔣君用文姑

蘇趙君友同也二人者忠信慈厚而皆跡於鑒皆為上
御鑒方纂修永樂大典編古方經二人者又總裁其事
遂得朝夕往還久之蔣君去侍青宮予亦兼官春方進
與蔣君接迹而並趨退而與趙君有校讎講益之雅相
得益密然不知二人造詣修飭於道者何道而能然也
意其質任自然一日過蔣君見其名齋曰靜學然後知
其所以進德者在此也於乎靜者德之基也先儒以謂
養得至靜之極則自然包括宇宙終始古今濂溪周子

上承孔孟之緒其示學者亦惟在於主靜夫所謂靜者非靜而不動之謂也無欲則靜靜之中而動理具焉故雖古今之遠宇宙之大千變萬化之無窮說之於吾心者不見其有餘也由是以御天下之至動而不見其擾理天下之至繁而不見其繁所謂淵默而雷奮者動之中靜之理所以行也靜體而動用靜存而動行此誠意正心之事而蔣君達此其過人也宜哉諸葛武侯謂才須學而學須靜者周子之言非有取諸彼歟然吾觀蔣

君之賢益有徵乎其言也蔣君與人處洞豁不爲深隱
人人愛悅之獨趙君澹然恬漠雖於醫亦不屑然二人
者中情甚相似皆善文辭皆有得於靜者因讀諸公所
爲靜學齋詩喜而爲之序既以貺蔣君又書以質之趙
君也

迎薰樓詩序

泰和羅養吾築樓而名之曰迎薰其來京師也屬能詩
者賦之又求予文爲之序予嘗愛其所居地曰洞源去

城邑稍遠而羣山高出百里之外望之尤奇凡居其下者對之足以樂也況又有樓居如迎薰者哉按傳記薰者南方夏至之風薰和融洩長遂萬物即所謂景風者八風之一也爾雅以謂王道平暢致景風舜歌南風之詩而天下大治成康四十二年之間薰風潛暢豈雍熙和平之時亦若此風者哉夫上之化及乎下下之被其化爲之鼓舞動盪者要之無異乎風之動物也養吾生乎太平之世沐浴膏澤以休厥躬憂虞驚慮不入其懷

意其登高以望遠也氣逸而神放而薰風之來又蓬蓬然適與之遇自其外蕩乎其中交暢旁洽其一時所適爲何如甚矣其可樂也然養吾之樂亦知其所自也哉夫涵煦於太和之中而不自知其爲樂與相忘於其樂而不知其樂之所自者皆可樂也昔楚子坐蘭臺有風颯然而披襟以當之曰快哉此吾與庶人共之者不知楚子是時其風果如是否其樂同乎今之人不同也然養吾是樂又王公大人爵位名祿者之所未暇則雖如

楚子猶不能同之是宜以之名其樓而播之於歌咏焉
予於山林之樂未嘗忘之而不能得徒取其詩諷而誦
之也遂爲之序

送李昌祺還鄉序

翰林庶吉士廬陵李君昌祺以省親得告還家其同年
交游之士各賦詩餞之屬予序其首予與昌祺同在禁
林者六年矣見昌祺持已接人之密未嘗一日有異也
蓋昌祺年方壯負氣而抱材學足以達其志行足以揚

其學又自處者甚高非禮義之所在雖千金不顧達人
貴士雖平生知識不肯一造其門故昌祺氣益高而與
之合焉者益少也其或與昌祺傾蓋而莫逆者必剛方
峭直之士苟容而阿媚者皆望風引去不敢近昌祺如
此豈一時尋常者可擬倫哉孔子嘗曰吾未見剛者夫
孔門德行文藝之所萃所乏豈直剛者而孔子每有意
在是抑獨何也豈以柔靡卑下者易於邪佞乎抑爲士
者不有以養其浩然則不足以當大任孟子所謂不動

心者在是也苟如是非學問之深到有以審夫義理之至精詳處而篤行之未有不屈於欲者也屈於欲則不得爲剛矣然無欲未易也吾之有望於昌祺故嘗畏而愛之邵子以謂與人處降意最難吾欲強交昌祺而每降意焉又不知昌祺謂予何如也昌祺二親俱康強見其子之賢而有立必其心甚喜之想昌祺之歸也林泉幽深而賓客填集烹羊擊鮮舉酒以相壽何樂如之吾又知昌祺於是時和色婉容之藹然矣是爲序

嚴氏宗譜序

嚴氏吾鄉之盛族也其始居縣城東南方宋元之際嚴氏爲極盛亭園臺榭臨郡城而俯大江雄峙壯麗照耀江許自喪亂以來嚴氏諸老凋喪迨盡其宗族皆散處別居然鄉之人士稱嚴氏者尤必曰城上云蓋以別於他族以見其盛也今年冬有思義者以其從祖宗旦及乃父文祐之命求予文以序其宗譜宗旦自城中分居縣南之小塘州其譜自兵革後散亂失次者皆不敢棄

輒爲綴緝其尚有可考者即勤勤采輯之所謂思晦者
宗旦之幾世祖也與胡忠簡公銓爲交友忠簡以直言
忤秦檜被黜也道出廬陵一時故舊交游雖甚愛慕忠
簡然畏檜之虐能多逡巡不相顧獨思晦無所忌且以
一子托婿忠簡故一時士大夫皆高思晦以謂使思晦
居忠簡之地必能爲忠簡也忠簡歿思晦詩亦自識其
事於後觀古人所爲事見今人之不逮也自思晦幾世
至縣尹某元初兵甫定而他兵復起縣尹教邦人捍禦

甚有力至今邦之老人猶能言縣尹故時居高門而廣
厦深嚴潭潭然人罕能到時其居即所謂城上者是也
自縣尹至宗旦凡幾世吾鍾氏叔祖元鄉先生實婿嚴
氏故吾於嚴氏事知之猶詳惜是譜不能完於前世事
皆畧也然宗旦文祐皆敦厚弘博起家致多貲能以詩
書禮樂教其子弟如思義輩皆俊雅夫前人之休光偉
烈後嗣子孫所宜深究而景仰者故為述之俾以識其
譜至於考求其世次而完緝之又任思義輩盡心也

姚老人詩序

姚老人者居泰和龍洲之上其地平曠幽曼樹林鬱然環其居皆沃壤連延數十畝老人既無所求於世惟盡力以事耕作麻粟黍菽之收歲至數百斛家穰穰然老人時而作倦而休釀酒盈缸東鄰西社老農老圃相與劇談而放飲醉則仰天而歌聲嗚嗚然甚樂也一日慨然呼其子弟語之曰吾年方弱冠遭元季之亂干戈相尋無虛日孰意其有今也吾今沐太平之澤得以優游

於田野者獨敢忘其所自哉顧昔之人有獻芹者吾與
若請效之即命為大筐藉以葉載蓆瓜薯芋之屬凡數
十筐至京師輦之上獻有司為白其事皇上嘉其誠不
鄙棄之乃命以獻既獻加賜慰勞遣還或者曰堯之時
康衢老人之於帝力不識不知而已今老人乃獨有感
若知報者將為有知識耶夫聖人在上涵育煦嘔如天
地之覆載無一物不得其所而老人者獨知私念帝力
誠有知無知皆堯民也昔邠人或獻斚于公或以所績

爲公子裳咏於七月之詩孔子列之於邠風其來尚矣
則夫老人之事固宜播之詩歌且以見聖化之盛也於
是衆爲詩以紀其事翰林庶吉士陳君士啓屬予爲之
序老人不知其名年既老稱為老人云

元故江西參政劉公挽詩序

公諱鶚字楚奇吉之永豐人公自幼篤學學既成遂遨
遊四方覽名山大川以增其氣發為文詞沛然也教河
南秩滿歸建浮雲道院以居之學者稱為浮雲先生累

遷秘書監郎與虞文靖公揭文安公歐陽文忠公諸名
士日相唱和其學益大進遷海門縣尹不赴改南雄路
經歷陞翰林修撰階奉訓大夫以內艱去官及紅巾盜
起東南諸郡望風瓦解而江州自李黼之死民益困乃
擢江州路總管改瑞州路未赴尋陞廣東廉訪副使至
廣繕城池修甲兵聚糧餉勵將士調度百出而上下翕
然賊不敢近移守韶州授中憲大夫廣東行省元帥復
拜嘉議大夫江西省參政越二年韶州蠻獠亂公分兵

遣捕之而贛寇乘間卒至時城中兵甚少賊兵強盛公雖老而氣尤壯乃自將兵乘城命他將領兵出戰公之幼子運亦戰死凡一月而援兵不至城遂陷公被執至贛賊幽之於慈雲寺時仲子述亦在焉公謂其仲子曰吾生平志於忠孝今不幸至此我死不瞑目矣作詩付述不食六日而卒享年七十有五於乎公起自儒生揚歷中外凡數十年而後受命邊閫膺國重寄不幸而國祚日危王綱日弛公之志謀才畧卒不及展而死於難

豈非命耶然公之死自足以暴白百世而深媿夫叛亂者又何憾哉第當是時修史者失之采錄不得爲公立傳以附元史忠義之次然予嘗之廣道韶聞韶人云城陷時死者尚多不止公一人今其姓名皆泯滅無聞古今死節之士蓋莫不然書不書不足較也今年冬公之孫某持公生時所爲詩文及元進士劉玉汝所撰公墓銘俾讀之既又以諸公所挽公詩辭屬爲序故述其大槩爲序之且以備史氏之缺庶幾讀者有考也

送醫士郭彥和序

翰林庶吉士袁君可遠嘗過予旅邸道醫師郭彥和活人多而其心益勤不倦近可遠之室人病寒瀉衆醫雜視之罔效最後彥和遺藥輒愈余聞而慕之且予亦多病也素公云彥和之先嘗贅居其里瑣氏瑣氏好施予有一僧謁之瑣待之良厚久而不衰一日僧拈筆畫一牡丹遺之瑣氏初不甚異既久發視之花之葩瓣中皆有字書隱然可見蓋古醫方也瑣大異之令其婿按方

試以醫皆奇效僧尋去竟不知所之後又有一道人令
聚藥煉爲丹俄見爐上有花絢爛若牡丹狀丹成如黍
珠以活人雖瀕死者甦由是珣與郭氏醫若神明珣氏
今絕無人郭氏之後有彥和也彥和蓋杭人云太史公
紀秦越人及長桑君之事皆出乎神怪杳冥聞者皆不
信其然而杭人郭氏之事殆有如長桑君者豈醫之理
深秘極乎造化之微口不能釋其意書不足傳其事故
往往有神人發旨以示人亦異矣哉審如是長桑君之

事可徵驗也則郭氏之醫誠有所自矣其取效於人有以哉

送陳教諭之官郫縣序

泰和邑庠弟子員陳所達由科第教於成都之郫縣其同年友數人皆爲詩餞之以予嘗教於閬之蒼溪也屬爲序夫蜀在京師西南萬里外山川之高深波濤之險壯望而想之猶爲之心戰膽掉然予於昔之遊有不能忘者凡吾身之所歷目之所遭奇偉雄絕交乎前而盪

乎其中浩然足以增吾氣而壯之也交游之士往還而
倡和氣相凌而語相迫足以搜滌勝槩而逞其情志故
吾之在蒼溪雖偷然挾策以事教學而脫然忘乎其秩
之卑也窺聖賢之真旨探古今之墜緒汎觀而約取鬱
乎其中者宣之以簡牘感乎其外者暢之以咏歌神適
而意會優游而怡愉故雖去國之遠於予懷無戚戚焉
巖洞之幽竒草木之叢茂與夫筍蒲之爲味泉籟之爲
音皆可樂者也今予雖欲解心釋形如往年之遊有不

暇矣則所達之行能無情乎所達年方壯氣方盛又穎敏有文詞以其素所蓄者卒然而遭夫幽異奇勝其所得又當何如哉適乎外而暢乎其中者殆有過於予而不止此也抑人之性情好惡有不同者則所達之遭與吾之所樂亦有不同然者乎有合焉以示余無忘也余與之相好者今或老而衰或滿而遷或泯然長逝者有之矣惟山川風景之如舊予因所達之去又有感焉於是乎序

送陳教諭序

皇上神聖文武超越百王萬幾之暇端穆無爲乃留情稽古召天下文學之臣啓秘閣圖書人文宏幹化機躬示軌度統貫萬類成書三萬七千餘卷命卜日以進既進覽之大喜賜名永樂大典所召四方士皆加賜遣還湖口縣學官陳廷傑先生今翰林侍講林君環所嘗從游而受業者也先生之去林君求予文以贈於乎方國家文明之盛制作之隆如日月行天而河海注地草木

爲之光華山川爲之潤澤蓋曠古所無之盛典也而先生得從士大夫講論其至要考索其精微書成而列其名次足以有光耀不沉晦矣予何言爲先生贈哉雖然予友國子助教歐陽允賢嘗爲興化郡博士時先生佐教郡庠與歐陽君實同僚歐陽君云先生氣畧宏邁喜功名慨然論天下事引大義以折衆說沛然不可遏也予聞之心竊慕其爲人意其必狀貌魁梧及今見之老且病癯然低首徐趨口未嘗道壯時事間爲文一吐出

其胷中猶瓌偉奇傑如其平生然亦尋棄去不屑屑也
獨時過予旅邸論其所以為教之道一時士子造就之
衆如前給事中陳君道潛林君文從今刑部郎中黃君
重皆端厚而明敏而侍講君又以巍科碩學遭遇聖上
者也蓋先生雖未得高位以顯庸振耀於時而人之服
其教者如此余用是知高材重望之士雖低徊卑官未
必無益於世而又以惜先生老而不及用於時使及用
於時又當何如哉因書以贈之先生莆田人

宜樂堂詩序

溧陽史君仲川兄第三人同居合食甚相友善宗族慕
其行鄉黨服其義仲川兄弟又恐其久而或怠也乃取
詩宜爾室家樂爾妻孥之語扁其堂曰宜樂之堂其從
子常以善書選至京同預編永樂大典因暇日出示宜
樂堂文一卷求叙之予第本之教溧陽常從學為弟子
員本之每稱道常之賢故不辭而爲之序曰夫人意之
所適無不可樂富貴之光華臺池鳥獸之繁車馬聲色

之侈舉世之爭趨疾慕如江河之流下而注海也而惟
君子不樂焉肆志嚴谷仰浮雲而俯清淵外物不能累
其心優游暇裕常有以暢其意而盪其懷此山林隱逸
之士所以逃乎世者而不專於是也亦其樂之一端蓋
逃乎彼者安乎此泊乎其內而忘乎其外是故君子有
以樂乎此也端其行以肅其家誠其身以敦其道閨門
父子兄弟之間藹乎其雍穆之行使過其鄉而望其閭
者皆知所敬仰名爵位號不加於己而風化之機默有

所關孔子所謂是亦爲政者又樂之尤者非有君子之行不能也仲川兄弟樂乎此而又兼得其樂之尤者吾於是乎深有慕乎其人焉仲川之先世系出漢潁陽侯崇之後崇佐光武舉兵定關中分土封於潁陽子孫因家焉今其廟尚在邑人稱祖侯廟蓋言史氏之祖也歷晉唐宋皆有廟碑載其始末甚詳見於郡志者其事亦合獨漢史不載其事古今事失不見紀於史者何限不止是也史氏在宋尤盛如丞相彌遠嵩之之類今散居

溧陽者猶數百家歲時皆合祭於侯之廟侯亦數著靈
異鄉之人無不畏敬也仲川予未及見之常則相與出
入乎禁林者凡期歲其從兄源今爲驍騎右衛虎賁百
戶皆溫良而信厚即余之所已見於史氏者如是於其
所未見者乃知之矣并書以爲序使讀者知史氏之盛
其澤有所自云

羅氏復姓序

姓氏上世所以別生分類要不可混也春秋郈子取莒

公子爲後聖人書之曰莒人滅鄆非莒滅之也主其祭以祀夫鄆者異姓耳夫子孫祖考本同一氣其精神自相通苟以他姓承乎其先則生者之精神與死者之魂氣已判而爲二如董子所述嘗時祝降神之事是也莒之滅鄆聖人如之何不深譏之哉秦之亡以呂政晉之亡以牛氏漢大將衛霍二人所冒非所承後世大賢如文彥博真德秀又以時之所諱忌者改其所生惟范仲淹能卓然知其所冒朱氏之姓此予蓋未之見焉夫

承乎先以統乎後使人之道不至如夷狄禽獸渙散離析而無所屬其於人倫教化非小補也此而不察何可哉予先世亦嘗後乎鍾氏至予始復本宗一時故舊耆老尤駭然怪之且謂讓不已從今見之世無孔子者亦其惑乎俗而未嘗考乎古也吾里中羅孟昭自其祖媚於邑之劉氏遂冒其婦翁之姓而後於劉氏亦遂以某之子爲嗣此與昔博士所議賈充之事無異傳三世歷數十年至孟昭始與其兄弟行十餘改復其姓請於朝

而易其舊籍遂使羅氏先世復得以歆其祀於冥冥之中孟昭可謂不溺於流俗而能由乎古之道矣因翰林庶吉士陳孟京來屬予一言爲序予喜其志之同於予也故爲之序使世有如予二人而未之復者讀此而悟庶不至於溺而忘返也

送江大尹詩序

江君奚修都昌人宋丞相古心先生族孫也古心爲文章持論高出乎古人而仕非其時進不得遂其志退而

委身以死於世亦偉矣哉然獨怪夫丞相後百數十季
江氏未有顯者聞有均霖者以能詩擅名都昌均霖即
奚修之尊父則江氏詩書之澤固未艾也奚修自幼承
其家學抱負才畧卓然著稱鄉閭洪武中以薦至京師
奉命按事閩越有能聲然奚修不事表暴欲晦迹一時
乃自混於醫以能醫選為大醫局官同預修永樂大典
出入秘閣者幾一歲奚修精練而博大又勤慎小心故
凡與處者莫不知其賢也求賢詔下有薦之於朝者擢

授溧陽令屬舊令還改高唐之婁津縣夫古之君子甘心於下位者雖或病其名之著而亦惡其實之未符也故君子寧沒世不揚而踐履之有餘寧終身不遇而篤行之無媿吾觀奚修僅僅自處於卑退豈非所謂君子人哉奚修之宰溧陽適予第本之教溧陽云溧陽人莫不愛慕奚修欲白於府而留之府亦欲白於天官俾與舊令並任一縣會非例卒改去溧陽人莫不怫然嘆息以舊令故不忍頻言也其爲縣纔一月耳使及暮歲三

年當何如也世之務名失實飾其外而槁然其中者能如是哉吾於是益慨夫古之君子者少見而深幸夫故家文獻之未泯也其友翰林修撰余君鼎相率爲詩以餞其行因屬予爲之序

楊氏族譜序

左春坊諭德兼翰林侍講楊君士奇以其所修楊氏之譜屬予序予觀之而嘆曰何其盛哉楊氏吉水泰和兩邑者皆出南唐虞部侍郎輅虞部始居吉安郡中其子

遷吉水若忠襄公邦人文節公萬里皆出虞部而譜不復錄者譜楊氏之在泰和者也自虞部又四世曰允素居泰和至今侍講君凡十六世其統或絕而不屬者詳其世次之可知不可知者則闕焉其支派分合稱位名號皆有法而不苟也在吾邦世家文獻鮮有過楊氏者方宋元間楊氏所居臺榭之壯接鄉閭田園之富連阡陌及喪亂起凋落而消亡者多矣獨詩書禮義之澤浸潤涵蓄沛然而不竭予獲與侍講君同侍禁林君之曾

大父吟牕公以廉潔忠厚著聲前代累官翰林待制致
仕事在元史循吏傳中吟牕公諸子如平洲如望之皆
擅能文章平洲之作如西漢盛時演迤浩博而極典則
望之頗瓌偉雜出於莊列而理致油然皆當時所甚推
讓而持行又甚高不可及也然皆遭時之亂卒死於窮
困不得大振耀於時今侍講君生逢治世列位清華方
受知聖上恩遇尤厚而其從子相又擢進士第居翰林
父祖子孫百數十年既僨而復興既墜而復振何其盛

哉吾於是乎有以觀君子之澤矣譜之作豈徒然哉予
祖母楊氏雲衢先生之子今侍講君之族姑而予娶自
明先生之子又侍講君族妹也然自予祖母之親與予
妻之昆弟皆無嗣未有後之者雲衢之後蓋轉徙於他
郡無聞焉徒賴是譜之存也然則合其逸而存其亡譜
之作豈小補哉因併及之

送羅秀才南歸序

秀才羅同以其學官之命奉簡書上報於京將別而歸

求予一言以復夫鄉之先生長者太學生曾夢淵又來
速予一言以贈予將何辭以告同也然聞之近吾邦子
弟抱美質負俊譽挾材而進乎鄉校者比比引辭以詰
難騁氣以矜能捉衿而並進連袂而羣趨操觚握管以
登乎先生之堂者偉如也其進而仕於朝得與士大夫
之論議又接武焉亦盛矣同循其迹而進可以自足尚
何徵予言哉豈以予亦嘗遊乎鄉校耶禮曰教然後知
困學然後知不足吾今而後知夫困與不足矣然豈惟

予爲然夫人萃衆賢而貯之充囊而滿橐穰穰然足矣
可無資於人矣而或能肆於百家之市售於通都之衢
應乎人之求者十無八九弊弊焉走東西強求以給之
如何其不誚於人哉夫古之教者自王宮國都至於黨
術閭巷莫不有學君臣朋友之倫視聽言動之則莫不
有以教之使底於中和之極而知其偏頗之謬消其忿
戾傲惰之氣而成其恭孫廉讓之風既克而後發既足
而後用非若後世馳心役志以苟於文辭利祿而已其

爲說具於六經子思孟子又從而推明講說之其指甚
深求之終身不知所止也同尚勉之無使徒為困與不
足之歸如予之今日焉可也聞予第洄與同同起處稍
相厚而洄方有浩乎自足之心所謂偉乎升堂者洄亦
其一也同歸以予文示之以復夫鄉之先生長者云

贈別胡生序

古筠胡生振來京師謁予旅邸予視生偉然進趨有容
其言論有節予固愛之也生嘗從吾弟學科舉業前年

秋偕多士試於有司生以未捷去今其來也察其志益銳若生者何患不科舉哉然生之志宜不在是也凡士之於道也必知之明而後行之至而知之方必自學問始奈何不求其本而專事文詞哉紫陽先生嘗謂習熟見聞知有科舉而不知有學問夫設科所以求學者也其流乃使人至於廢學豈不失其本哉生之質甚美要不可忘其大者也予又聞生之大父商隱君持身耿介而識見絕人國初太祖高皇帝遣大將軍平江西諸郡

以次定獨筠城守帥尚不屈聞大將軍別遣將誅守者
遂謀盡殺城中人引衆遁去城中人皆洵洵賴胡君力
陳禍福守者乃以城降大將軍欲官胡君君竟辭去大
將軍亦不强也至今筠人德胡君不忘夫活千人者必
有後今胡君所活數萬身不蒙其利傳曰不在其身則
在其子孫予用是知生之蒙其澤有自也生之質如此
其美承於先者如此其厚而求速成於小效可乎哉念
先世之勤以成其所大者予有望者甚深也於其歸為

之序

習尚鏞詩序

憶昔往年予與習君尚鏞同考試廣東鄉闈君與予故同郡甚相厚也既而有旨不果試遂皆別去君宰長樂予守陽春地相去千餘里不相聞者久之會朝正京師與予偕來予有史館之命而君之去甚遽欲相與一言不可得也然往往聞人自嶺南來輒相從問習君習君爲政寬厚持平若古之循良吏然長樂地險而俗陋前

此爲宰皆難之獨習君以能職聞既而以考績詣天官
過予旅邸聽其言論又讀其所爲詩文蓋君之齒益壯
更事益多故其言澹泊而理緻精懿其氣坦夷而心志
堅定予既察其行事又知其文辭如此蓋卓乎其未易
及矣習君援例復任長樂乃以其詩一帙屬序之夫文
學政事理同而事異自昔聖門之教且不能合而兼之
者況去聖人遠後世之爲教者又不知因其材以培植
篤厚之士生斯世雖窮心力以就一偏猶不足以適於



用況求其能兼善並美如習君者哉習君詩若干首讀之不獨知其才之美且知其爲政之良也於其去姑爲之序君諱韶世家吉之永豐云

黃逢源字序

予友黃君孟岡以其從弟濬字逢源屬予發其字之義濬父嘗爲都給事中於吏科於予有同朝之雅則爲之言以告之宜也夫源泉之本也孟子所謂取諸左右逢其源者在深造之而必以其道焉爾然源者流之本

也江河之大浩瀚汪洋回折萬里而不可遏者其勢則
然也堯舜文武周公之道仲尼之教與天地並立而無
窮者其源端且厚也眇乎百世之下邈乎千載之上而
欲泝其流以探其源非百倍其功可乎哉疏之欲其通
引之欲其達涵之欲其深蓄而放之也欲其一日千里
此古之人所以孜孜焉終其身未嘗一日怠也夫造乎
古之道者過乎今之人也遠矣溺乎今之學者去乎古
之道也亦遠矣故君子之用其力也不淺近而止其不

淺近而止者蓋有不能自止者存焉自名物度數之微
循而上之極乎性命道德之蘊如之何其可以止也行
之而不息進之而日強則庶乎逢其源矣逢其源而謂
古之人不可幾及吾未之信也黃氏世家興化自唐以
來多名士宋熙寧中有狀元諱公度者即濬之九世祖
而給事君今方被寵光於朝然則濬所以承乎其家者
在此也可不勉哉可不勉哉因爲之序以復於孟岡

石岡書院詩序

西昌城東南三十里有山曰石岡蕭先生自誠家其地
凡十餘世矣松竹鬱然庭宇幽夙則所謂石岡書院者
也蓋先生之七世祖儀鳳之所建宋末燬於兵儀鳳從
孫梅溪復創之元季又燬於兵則梅溪之孫三溪創之
三溪則先生之尊父也始終百餘年書院燬而復建者
三焉夫人事有廢興理固然也然君子篤志勵行乘時
以圖不朽則不係於是焉儀鳳登宋漕貢進士致身顯
宦其子子安亦仕宋爲諸王府掌記丞相文信公敗而

南也子安從之起兵一時豪傑慕義之士皆聞風而起
及丞相之被執也子安死之十載之下聞之爲之慨然
夫丞相之名節與天壤並立而子安亦可謂烈丈夫矣
嘗聞鄉之故老言丞相敗時事云當時死者極多事既
無成其家人子弟懼禍往往諱言之故忠臣姓氏多泯
滅不得列於大史氏以暴白於後世然至今鄉人有得
丞相要結起兵時手帖者猶什襲之不忍棄去嗚呼遺
墨槩楮人猶寶之如此至於死節之士何獨諱言而使

之無聞哉有如子安者豈不深可痛耶古稱志士殺身成仁求無愧於心而已睢陽之士從巡遠先後死者豈必盡書之史氏也苟無愧於心焉書與不書又不暇論也子安之死此石岡之偉烈也在鄉人所當仰慕者況蕭氏之子孫守其遺構舊業也哉自誠先生敦厚而信慎雖老猶喜道其事則其志可見矣今年冬來視子省身於翰林以子安之歿已久而書院存焉求一時名士歌咏之且以謂書院教之地也而子安事有關名教甚

大以予為史官屬為序夫發潛德而紀先賢後生之責也予不敢辭故備書以序之讀是詩亦可以興矣

送山東都轉運鹽副使蕭公序

前吏部尚書劉崧之高第弟子曰鵬舉蕭公事我太祖高皇帝為蘇州同知今為山東都轉運鹽副使既三載考於京師復任山東或者曰公老矣較利分毫於簿書期會之間小有弗當輒獲大戾維年少志慮精明者庶或克之公非其職也公視之泰然於是趙府件讀鍾啓

晦其甥也來徵予一言以餞之予惟公之學於劉先生者舊矣先生之德汪洋停蓄而不著其迹其為教因其端緒引而伸之俾自出之故從之遊者咸知正志以自養而公之得於先生者蓋多也公之在鄉也其自守嚴而人稱其長者也其居於官不徒廉也而接於物者勤而厚其為詩無嫵媚態雖甚貧且老所以持其己者不少衰也甚矣公之有得於先生者多也夫君子之事業係乎志焉志之堅雖老猶壯志苟自隳矣雖壯且勇不

足有爲也公不以老且貧而移其平昔如此宜乎其處之泰然而無不可者夫何憂乎其難哉憶予童小時聞劉先生之館於蕭氏也每好遊詠以暢其懷其所與遊者率多名士金華之岡武山之麓騎往而輿歸極飲盡歡惟公爲之傾竭故先生之詩凡爲公而發者十常二三今讀而諷之其交際之情相知相好之深猶可想見也夫國家自賦稅之外惟鹽之權最重今天官之選必得公其人豈無意哉又三載而來也人誦善政必推本

而言曰劉先生賢弟子如此予尚當與故鄉多士候於都門外而賀焉

董太守詩集序

知海州董君厚英集其所爲詩若干卷水部主事曾君仲濬以屬爲序予素聞董公賢心竊慕其爲人得其詩未暇盡讀間取而諷之知董公非徒務爲音韻之諧體制之協而已觸之於外發乎其中或曲而暢或婉而達如行空谷幽意獨得蓋不必他人之盡喻此董君之自

得也故董君意之所適輒見之於詩讀其詩有以知董君焉董君氣充然言論深厚而其為海州也守其身既嚴而施之於政者又果行於家可法乎其民庶幾乎古之循良吏也於乎昔人所謂登高能賦可以為大夫觀之於董君豈不信哉然古詩三百篇自非宗廟朝廷稱頌告戒之辭多出於田夫野老優游閒暇者之所為而當時公卿大夫所作無幾也亦豈有所不暇哉抑亦功業之大足以及乎民則詞語之細無所用於世耶果然

則董君之大者又不在是耶君四明人逮事太祖高皇帝爲廣西參議既老低徊一郡守與曾君嘗同僚所居一榻扁曰澹游故其詩曰澹游集云

贈蔗境翁歸教上海序

泰和尹務厚先生今年夏以編纂召入禁林尋以老病得賜告歸教上海皇上復加賚予眷待優至人皆爲先生榮之先生嘗名其軒曰蔗境既又自號爲蔗境翁於其去潛送之城南門外相與酌酒爲賀遂進而問之曰

昔人有言仕宦如顧凱之啖蔗漸入佳境者蓋以逡巡
卑秩而躋於顯榮沉困澹泊而入於甘芳此雖常人之
所羨而亦定分有命者之不可強而得也苟得之斯謂
之蔗境矣今先生以七袞之年窮一經遭明盛之時曾
不見試於公卿之門出入臺府之間吐奇獻計以裨夫
聖政之萬一徒低徊下位僅僅自守既無以加乎人又
不能裕於己乃尤以蔗自啖抑獨何也豈濶步長趨之
難追而倒行却走以自快耶言未已先生撫手大咲曰

予與子處者素矣而猶言之若是况非素知予者宜乎其喋喋哉雖然予秉節亦何嘗苦也予始冠值元季兵亂奔走逃避於亂者無寧日幸干戈底定始知挾冊呻吟以爲苟安計既而予有子子又孫沐太平之膏澤進秩文學亦足以自高矣且脫略不羈可以逸其老酣暢自適不爲曠其官後之樂過乎前今之得加乎舊此予之所以甘心焉者孰謂非蔗境耶縱九鼎前呈吾不以易此也然則吾之裕於己者至矣而奚以加乎人哉言

已復浩然咲去不顧予聞之歛容而嘆曰麓境翁有味
乎其言之也易所謂苦節不可貞而有甘節之吉麓境
豈必非甘節而底於甘節之吉顧予何足以知之於是
乎書

慶涂氏母壽八十詩序

翰林庶吉士黎川涂君其祖母夫人今年甫八十涂君
密數其齡忻然喜之然以去家遠不得朝夕侍膝下歛
然若有憾於懷者既以語其同里素所往來者則又以

告其相知親厚者則又語夫凡同年交游之士聞者皆
爲涂君助喜遂各賦詩以遺涂君俾以爲祖母夫人引
年之貺且以樂其志抑亦釋涂君之憤懣也詩多積成
軸涂君持示予請爲序予與涂君同出入禁林數歲視
涂君氣和而色溫循循然終歲未聞涂君有疾言遽色
以失意於人者人亦甚愛敬涂君涂君真純孝人哉予
又聞涂君之尊府登洪武甲子科進士第仕於朝爲給
事中恨早世而涂君之母夫人今亦老矣二母蒼頭鶴

髮並列一堂而涂君能奮自孤童日以詩書自課竟取
科第入翰林爲時名士涂君蓋又真能以志爲養者也
夫子之於親以志養者其意氣恒相通如肺腑之相屬
自不懸隔則涂君於二親雖更越千里不遠也涂君謹
行以純乎其孝又能以志養其親如此以踵前人之聲
光居清華之密地其爲二母之榮壽何如哉古之人令
妻壽母之歌春酒介眉之祝未嘗不形之於歌咏則凡
與涂君交游而賦其事者其亦宜哉予故樂而爲之序

壽安堂詩序

予第本之往教溧陽與醫學官曹君孟文爲交友孟文醫術精專而用心誠實今年秋來京師過予旅邸談論連日夜知孟文有老母年九十康強無恙早暮起居猶勤勤誨子弟曰必讀書爲善人苟不爲善雖烹羊炮羔吾心不樂也誠爲善雖啜菽飲水吾之心樂也雖老其精神智慮不衰猶如此或有過孟文喜其親之壽而康強也爲題其事親之所曰壽安之堂孟文求能詩者歌

咏之因屬予爲序夫人莫不願其親之壽而有不可必得者其或壽矣而老憊衰病之侵不能安也苟壽而安矣而時非太平之盛家無可資之產索莫無賴或奔走道路而遠違其親者何限則雖壽而安不樂也今孟文官雖卑可不去其家無政治之繁苛守之以老山林之幽迴田園之密邇親愛子弟朝相問而暮相聚也用是以娛其親而和其志則宜乎其親之壽而安也孟文亦其幸哉然吾觀孟文雖老澹然寡嗜欲飲酒終日不亂

諧嬉咲謔神氣恬暢亦皆壽徵也詩曰豈弟君子遐不眉壽又曰令妻壽母三壽作朋其在孟文乎於是乎書

贈大尹戴君序

予假令陽江時適莆田戴君原性爲僚屬君靖恭而不肆廉慎而益貧然自以老成先進低徊下位削去觚稜鏟除崖岸舉耿介特立之氣消藏而掩閉之蓋非其謀之拙計之窘局於所居守姑孫焉自晦求無忤於物而已豈其所欲哉雖戴君未嘗幾微見於色而吾不能不

爲戴君動念也且陽江地濱大海其民多豪武竄名軍籍中搖毒以自防者皆是獨戴君能以理爲之勸喻嚮道凡兩考卒以能職聞則戴君非苟爲自適計誠所謂和而不同者戴君又焉失其爲君子哉近有以其名薦於朝者天官庶得其實以聞於上擢興寧縣令吁戴君是行亦可以揚其所蓄矣夫馳騁於康衢與折旋於蟻封者其勢不侔戴君將凌厲挺拔以爲高抑隨浪混世以自同耶將震耀奇偉以爲新抑因依順適以從俗耶

承乎其上者不易也懷乎其下者亦不易也抗辭以自
守與惕威以奔命者不同綏之以慈惠與齊之以刑罰
者亦異凡事幾之會惟其施之當而已予昔焉有資於
戴君者猶所謂佩韋也今予以空言無益誠有裨於戴
君乎哉戴君必有以自處非予之所能盡知也因其行
書以贈之戴君其擇焉

具慶堂詩序

翰林庶吉士錢唐孫君子良嘗過予道其友張用良之

賢且稱其孝友深至鄉之人鮮有及之者予頗惜未見
用良也今年秋用良來京師始獲識之於子良寓所其
進止循循然氣質清明言論慈順信乎如子良所云及
聞用良二親尚康強兄弟數人皆有美質如用良之孝
友何其美哉或有扁用良事親之所曰具慶之堂用良
求能詩賦咏之因子良屬予爲序夫人情之所願欲事
之可喜而可樂者莫大乎父母兄弟之無故是即孟子
所謂三樂之一也蓋人之樂而繫乎天者也係乎天者

有命焉非人之可必也人於其不可必者或得之於天
其爲慶祥祉福孰大焉得之於天矣而不能祇敬恭順
以盡其在人者則爲負其天者也人而至於負天其爲
罪罰悔吝又孰大焉以慶祥祉福之獲而不能將順以
爲樂至罪罰悔吝不能逃悲乎其可慨也今吾用良有
父母兄弟而能篤天倫之真盡孝友之道以無負於天
無媿於人可謂賢矣用良與子良交甚厚子良直毅少
許可而甚稱用良傳曰不信於友不順乎親用良信於

友矣其行之於家有本矣播之於歌咏孰曰不宜於是乎爲之序

水天清意軒詩序

予弟本之近自溧陽至京師與予言溧陽楊公亮之賢昆弟季友讀書篤行其器宇甚高不可以淺窺嘗構一軒於瀨江之上終日獨坐其中天光湖影既足以澡雪其志慮盪滌其志意而鳶魚飛躍之趣又若油然默會於忘言之表者因題其軒曰水天清意軒詩者爲咏歌

之求予文爲序於乎予方酬酢紛擾於詞語之末構闢
之相汨無斯須少暇亦何足以發輝振越於公亮哉然
人之有心所以神明萬化惟學問可以致知惟無欲可
以主靜而非幽隱閒逸以少絕夫外物之累則亦未易
以察識夫聖賢天地之量也李愿中先生謂常存此心
勿爲事物所勝終日危坐而神彩精明康節先生謂養
得至靜之極自能包括宇宙終始今古之人所以存其
本體而致其功用之妙者如此今公亮年既老謝紛華

而絕外累久矣吾意其優游一軒之中微吟短咏遠求
近取山川爲之春涵草木爲之光輝其爲水天清意默
有所解而口不能發也因論而序之使讀者知外物紛
華之無益而予於山林之士亦有媿也

贈教諭康孔高序

康公孔高往與予同遊鄉校同舉鄉貢上春官俱下第
爲學官各自東西去不得見者幾七年及予來京師孔
高亦以朝正至別去未幾聞孔高以母憂去官矣既服

闕而來得改教於沔陽之景陵於其去不得不戚於懷也一時故舊在京者皆爲詩餞之予孔高素交也屬予序焉孔高抱負才氣而騫偉不羈凡交遊之士莫不羨孔高開通卓絕予以爲使孔高得用其所長以理治繁劇當烈烈有能聲有顯效爲一時所重乃瀟然抱遺編日與士子講論課策卑卑爲儒者事雖孔高油然自得予固惜其材也孔高鬱乎其中者既無自而宣暢意其中必有甚不屑者存焉及其徒有在太學者聞其來皆

持酒殷爭來拜謁惟恐有後皆以爲自先生之去無以
考質疑問貿貿焉至今不知所以爲學至有泣下者苟
使孔高有不屑之心能使其教之及人感慕向往之篤
如此哉夫孔高蓄之厚而不求其施處之卑而能安乎
其命盡其心而無慙其中如孔高者可謂君子也已予
用是又卜其將來可用於人而未止此也尚其益加勉
焉

贈劉仲戡省兄還家序

太學生廬陵劉君仲戩來京師之明年其弟仲戡來視
仲戩於太學將還翰林庶吉士李君昌祺屬予一言以
贈之且謂仲戩孝弟而恭孫其志也銳其學也勤其才
不下其兄仲戩也予與昌祺同編修秘閣最後得仲戩
來皆相知深厚昌祺穎敏負氣剛介不少屈不妄交人
人亦不黷交昌祺也乃獨與仲戩善仲戩從容而慎密
寡事而多材方編摩倥傯簡編如山海非甚有精力無
不困憊者仲戩朝夕從事未嘗少怠予賴仲戩力益多

今又獲交仲戩因其兄而併得其弟因交昌祺而併得
二人者同類之相遭同氣之相合何其樂也昌祺與仲
戩居同室學同業嗜欲好惡不異仲戩之在家一家之
政皆仲戩所經度仲戩藉是無內顧憂益得盡力於學
問今雖去家遠仲戩亦何憾於已哉然仲戩之材人咸
知慕之以其名薦於朝久矣獨不知有仲戩也使知之
能不為仲戩奪去哉因昌祺之請故書以為仲戩贈云

歐陽助教重修族譜序

予嘗觀國子助教歐陽允賢十一世從祖參軍毅誥勅
及其行實知其見忌於秦檜未嘗不悲嘆之及觀其譜
謀見其子孫宗族之盛則又羨慕夫君子之澤也方毅
以護軍長史參韓世忠劉錡軍事高宗一見知其賢遣
奉使于北詞氣侃然不可屈及歸即途中斬金將之首
以徇何其壯也毅是時功業可引手致矣而爲檜所
擠竟不大用以卒於乎自劉岳諸將之罷一時才烈之
士低徊老死於下位如毅者豈少哉欲求其有後與否

又不可知矣檜之惡甚矣聞其後獨繁徒以檜之流毒多諱言所從出夫爲惡不必無後爲善不必有後然以檜之子孫顯絕之於後世則檜之有後猶爲無後也檜雖死地下視歐陽參軍寧不有媿耶歐陽之先自吉州爲刺史琮生子彪彤萬彪之後不復續萬爲福安令傳九世即爲文忠公修歐陽之譜最號有法蓋自公始爲之彤七世至宋大尉梁國公忠勅塋萬安子孫遂爲萬安人忠八世即爲毅毅弟德祖由萬安徙泰和之蜀江

至今允賢凡十一世其爲譜源委端緒愈久而愈著不
妄如此蓋與文忠公之譜並行也予嘗過蜀江見歐陽
氏諸老若三峯先生某若觀民俊民伯仲皆宏偉博雅
及來京師與允賢日相往來其從弟允俊以庶吉士留
翰林同預編纂又皆才力壯健而學問過人允俊因暇
日以其譜屬識一言予嘉參軍之壯烈而喜爲其後嗣
宗族道之使以自勉也

贈歐陽助教歸省詩序

予來京師之明年故人歐陽允賢以興化郡博士陞授
國子助教又三年考績天官得援例歸省其親凡故舊
仕於京者皆為允賢榮之且相率賦詩以餞其去而屬
予為序憶予未仕時與允賢交厚允賢取科第宦遊四
方別去幾十年既而得仕京師無旬日不見見即劇言
深論懽然也今翰林侍講楊君士奇與允賢尤相好每
暇日允賢出太學而來也輒使人走東西要致之至即
數人者皆來連挽之不聽其去歌咏諧嬉淋漓傾倒往

往至夜分不止或遂不得寐呼與隸秉燭趨朝去亦何
其樂也豈外無觸忌之嫌而內有脗合之趣耶不然沐
皇上太平之澤恬逸清華無所累於心而尤脫畧至此
極耶豈不過矣然允賢爲人寬易諒直不鏟削爲峭厲
亦不苟附而妄隨其爲文章似其平生氣平而意雅人
讀之知其爲允賢作也允賢凡見人過失又能懇懇曲
折指告之必使之改乃止由是予數人者益慕之而願
與之狎於乎世之士相頡頏勢位外爲深密而中懷忿

疾以相夸勝者多矣苟坦夷相接則同欲合私鮮有所
規亦何足道哉然則有如予數人者或庶乎可以免此
矣允賢家泰和蜀口兩江之間江數里合流而東為金
魚珠浦其族繁衍幾千指其子弟以科第發身者多矣
今其歸得一見其長老接其子弟歷覽丘園之勝其喜
蓋洋洋矣然吾數人者不可一日無允賢也望其來毋
久稽也

贈王紀善序

往年予與王君作昭俱遊邑庠作昭力學爲文辭甚雅
潔與人交忠信而和易可親愛而不可慢也別去久之
聞作昭舉貢上春官心竊喜未幾聞作昭授官徵稅於
京師意頗悒悒不樂且嘆作昭不遇也然作昭能莊敬
持已又廉潔雖居卑官若蒞顯秩用此名聲遂大著今
皇上紹登大寶作昭遂被簡擢肅王府紀善將別過予
言曰是行也吾殆有得焉吾聞肅在陝之西北極遠萬
里外黃河之波濤潼關之壯險終南大華之竒拔高峻

天下之奇勝也道而過之可仰觀俯視以滌蕩其胸中
且吾之學未博藉此以自廣也吾意作昭去京都舍故
舊於萬里外必有遠別艱難之狀而其言乃爾此豈非
宏曠超邁之士哉夫士之立功業以有成者必其氣之
充也不然未有不蕩於外長其中焉作昭於得失之際
處之脫然如此誠有以養其氣矣則作昭自今以往益
大著其功業者又可量哉遂書以爲別

送吳縣丞序

予假令陽春時適番禺吳君子育爲之丞子育端士也
慈良而溫厚其用心惟恐其悖於物而病乎民也嘗歎
然若不足者予愛之其交也特厚其志慮又相同也子
育嘗按行邑中還或忻然以喜或憮然不樂長嘆久嗟
中夜猶不寐予見子育之忻喜憂嘆不待言而已知其
心之有以然也雖子育於予亦不盡言予以爲陽春極
天下之陋然得丞如子育者即不陋矣予來京師又一
年子育以考績至雖別之久相見而言未始有異也先

是有舉子育於朝者召至京師將加擢用焉而未果及
考於天官政績居優等將加擢用焉又未果遂以一丞
弊弊焉復走嶺海外人皆惜子育之不遇夫時然予獨
喜陽春之得也夫以陽春之僻且遠得丞如子育而民
安之苟通都大邦爲郡守令丞者皆如子育焉可以少
副我皇上側席斯民之心矣何獨少見之耶然以陽春
而得子育則通郡大邦如子育者必多顧予偶未之見
也予又聞子育之尊府君嘗爲令廣之廉山有惠政其

民至今思之不忘廡山亦陋邦何吳氏父子所居官皆
惡地而皆有善政豈其地雖惡而天固不鄙棄其民必
多使賢人君子以化導惠養之乎果然則吳氏一門二
人矣豈非命耶命出乎天凡人之行合乎天者其獲報
必昌光顯榮而少遲然則子育亦盡其心以俟其報於
天可也又奚以惜其去為哉於其去書以為贈

贈僧冰壺歸西昌序

憶予未仕時讀書於城東寺之地藏院冰壺始祝髮學

浮圖氏禮雲間禪師而受業焉未幾來從予讀儒者書其質醇雅而溫厚與之語道理講析古今已隱然見端緒及告之以天人物理之際禮樂人倫之大亦深悟其所以然者予既愛其質之粹而又惜此之失而彼之得也是時予與雲間又相好然雲間混一世於塵埃中顛倒諧嬉傲然自適一時名士大夫皆相與爲忘懷莫逆眇論微言巧射曲中四坐爲之絕倒有不愜其意輒白眼怒罵之亦莫敢誰何也獨酷愛冰壺不置遇佳客長

者來輒誇道出示之於乎雲間沒又十餘年矣而冰壺
今已長大長身秀眉竦然叢林中惜乎雲間未及見也
使見之其誇道喜悅又何如也然冰壺年益長而行益
篤事上恭接下有禮蓋遊乎方之內也雲間傲放以爲
達冰壺循規而自守雖規模不同皆高士也時皇上祝
禧於高皇帝於是天下名僧皆集京師而冰壺亦在焉
既竣事受恩賞而還書此以贈之所謂散僧入聖小禪
自縛者庶幾冰壺與其師皆近之而冰壺又非自終者

也

送楊生剛歸溧陽序

代作

翰林修撰梁君潛之第本之爲溧陽教諭之數月凡學之政教弛廢者一旦翕然且興既又以其書籍缺未備不足以資學者考習命其徒楊剛來太學摹印以歸修撰君以予與本之交游相好之深也欲予一言以贈剛之還以進剛於學且以勗其第本之也修撰君之愛其第無不用其情如此然予聞君子之學於堯舜文武之

道周公孔子之教非徒講而習之也必使得之於心者
明白而堅固則措之於事者正大而悠久正大則德尊
而道著悠久則化洽而民附古之人之治與教蓋如斯
而已予往年與本之講論之以此自念於心然汨於物
者多矣獨本之養之以閒靜無外物以亂其中所蓄之
富所積之宏氣盛而志暢予固有以觀其壯偉光大於
將來也剛之從本之學質甚美志甚端其來京師未嘗
一出遊市肆中神樂觀有裘煉師者與剛同里善鼓琴

剛主於其家相與清論終日無毫髮塵俗氣由是修撰
君甚稱道之予又聞剛之祖公亮老成有問學喜賦詩
有古長者風則剛外服乎本之教內閑其祖之訓其
於堯舜文武周公之道蓋將有得焉夫得天下英才而
教之古之聖賢猶以爲樂吾今見剛可不爲本之一擊
節哉遂書此以復修撰君俾以爲剛贈且以告本之又
因以慨予之顛墮無成也

送周如陵序

予往年教於蜀之蒼溪泝夷陵而入三峽仰視羣山如
萬仞壁立岷江東下束手兩崖其勢若不得放抑遏之
極驚跳怒躍逆而爲回湍激而爲飛瀑觸而爲奔瀾其
尤險者則爲虎頭鹿角盤渦百尺旋轉若車輪轟然萬
壑皆應觀者莫不目眩不禁也過夔萬而上三巴稍稍
見平波緩流然巴郡據三江之險因石爲城懸流飛瀉
雲霧中益可愛也自是西走千三百餘里始入成都平
曠坦夷疏江爲渠散注平疇幾千里其西有雲山縹皓

明潔與晨暎爛然相照蓋天地間之奇觀獨偏方遐國
擅而有之使傲遊隱逸之士得時時臨望以盪滌其志
意何其快也又其地有諸葛武侯之遺教關張之忠節
勁氣至今不衰又蘇氏父子文詞壯健數百年來無有
過之者故蜀之勝又不獨山川然也予去之十年至今
念之不已今年夏忽廬陵周君如陵歸自成都訪予京
師之旅邸極道往時之遊且樂予不覺解心釋神焉今
如陵又將有所遊惜不能與之翱翔其間也雖然人之

情因事而感固不繫山川之遭杜少陵窮愁悲慨終身
不釋豈蜀之山水獨有以感其中耶彼所遭之時爲然
也然則吾與如陵壯年遊樂何可不知所自哉凡與如
陵交者皆爲詩以餞之而中書舍人吳君平仲爲書西
川壯遊四大字於卷首以予故嘗遊於蜀也屬爲序之
贈嚴元晏序

嚴氏爲吾邦鉅族而元晏嚴氏之尤賢者卜居金臺山
中澹然無所慕於世而一鄉之是非曲直必俟元晏一

言而後決元晏既與世謝絕獨喜談醫藥予居家時好觀黃帝內經及劉河間張長沙諸公之說時相往還講論者惟瓊州守王伯貞先生白水丞陳孔立先生二公既喜與予言而尤得元晏數人者皆相與莫逆也及王公去守於瓊白水公故無恙每出遊則必過予柳溪之上或之金臺則必留宿元晏家宿元晏家必遲留不即去攜童奴徧歷溪澗遇藥輒俯掇而嘗之或圖其花葉而默染其形色呼僮置策中乃行行不休言亦不已至

幕始捫蘿而歸其樂陶然也蓋瓊州公與白水公脫畧
而有趣元晏則篤實而穎悟予亦散曠不自羈故數人
者甚相得予宦遊於外不得與元晏狎者六年矣白水
公已物故瓊州公又阻於官守思欲如往昔相聚論不
復可得今年夏忽元晏來京師予聞之心喜不自勝及
元晏過予旅邸未及一言也輒起他去雖強留不少住
斯須未幾竟別去元晏豈今有不釋於予哉豈其志慮
昔同而今異耶抑何爲其然也然則如之何其可已於

懷耶他日倘得乞身歸田困病之餘無以自資當求醫家書與元晏日一閱之以償吾平生之夙志而無忘山中之舊約也不知元晏尚有意於此或棄去否也書此以贈之因以識予懷

贈朱孔良序

皇上紹正大統九有寧謐萬幾之暇端居無爲乃游情於文藝萃天下儒臣俾編纂秘閣文籍上自唐虞下及當世天文律歷諸子百氏旁搜而彙緝之括之以類統

之以韵蓋將會萬卷於一編合萬世於一時者也然其
功浩濶非日月可計而簡冊增於尋常部書萬倍皇上
乃又命天下州郡能書之士皆集於文淵閣俾以成書
精寫上進泰和邑庠生劉俊預是選俊志銳學勤又溫
恭而慎密凡在禁林與爲交游者莫不忻然愛重之今
年夏其婦翁朱孔良來視之予既與俊同往還禁林而
又獲識孔良心甚喜也孔良世家邑之屯州屯州朱氏
族既繁多賢子弟又有老成人如孔良者孔良來京師

數與予談論其氣溫其容肅予益知孔良之賢而惜乎其識孔良晚也俊之婿朱氏也稱其爲佳婿然俊方圖見用於時而孔良惟務抑遏掩閉不使自彰雖吾邦之人知孔良者少也孔良歸故舊在京師者皆爲詩餞之予與俊當盛世文明俱預榮於大典故於孔良之歸敢誇道其事以爲贈

贈朱知縣序

古筠朱貴登永樂二年進士第選蒞事於都察院之廣

東道視舊制蓋習觀乎爲政之難易得失非實有職任之委也貴於是乎有憲臺之重而無官守之累焉既有旨命還家明年夏復徵至京師俾蒞事於大理寺其在大理如在察院時貴徒以一進士兩居要地視訊鞠之操縱知已用法之權衡非唯有以博其識習其才而以無所累之心縱觀於叢脞轆轤之表人情物理之際必深有所見也夫汨然而不暇者或有所溺於心譬猶博者之相對而勝負之迹形焉情不能不中怵也故惟以

無情者旁觀夫有溺者之心則彼之失焉者吾且得之矣得之於外既多積之於中益久則其發之也必將沛然而莫之能禦者矣貴之所以昔焉而觀之者誠若是今去而爲唐山唐山小邑也其地僻遠無迎送之繁其民質實無爭訟之擾其去京師蓋千里外以貴之所素歷如彼而其所試者若此抑將何如其用心也將其心亦易之乎豈惟易之也加乎其身者若未嘗有令焉則又無所累其心矣然貴嘗從吾第本之受經持其心

未嘗少怠其接於人者欲然其虛也則雖無所累其心
必不自逸也必將挾其曠然自得之志而益觀夫人情
物理之無窮者矣屢觀而屢有得焉吾不知其將來何
如以發之也遂書以贈之

送蕭教諭序

予往年遊鄉校聞廬陵蕭君引之以端重力學著名郡
庠未嘗不愛慕其爲人然會聚之日甚少也獨時時得
其所爲文章讀之有程式有典則開宏張大而不逸乎

矩度甚似乎引之也自吾宦遊四方引之由科舉爲武義縣學官皇上紹登寶位之初朝正京師得相會焉蓋與引之別去者久矣時鄉郡故舊仕於京者多引之平時莫逆相見道平生歡忘懷膈合一無所忤樽俎相酌或深夜不止情志諧暢巧詆而豪譎曲諷而旁嘲莫不闕然自放獨引之簡默不可以意撓或時作漫浪語以少折衆鋒則又未嘗不切中肯綮也願引之務自囊括鄭重耳由是衆皆推敬引之丈人行而予益不敢慢交

引之也引之去後以憂還家又三年服闋而來改教於
崑山縣學衆爲詩以贈之翰林侍講鄒君緝熙以予故
知引之者屬爲序夫教之職與師之道甚難也彼郡邑
子弟年少負盛氣而抱銳志者方自視無前而吾欲抗
顏爲之師則非素有端慎之行真積之學未易使之帖
然無齟齬其間如吾引之者於師之道教之職殆無愧
也哉外以施之人內以增於己文以博其趣而行以成
其德是則爲引之之師弟子交相賀也惜予去引之遠

不得相請益矣因以序之詩凡若干首

耕讀軒詩序

夫古之達人志士藏跡養晦使其身有所寓而可安志有所適而可尚油然渾一世於庸常卑賤之地者何也所自處既淺則其所蓄者易傾故常有以自晦而深其所蓄也泰和魯君能濟名其軒曰耕讀持其一時所賦詩二卷謁予序予家居時見能濟方垂髫挾策往來於先生長者求益今長大老成遽見已莫能記憶蓋曾氏

吾邦鉅族宋熙寧中有諱安强安止者兄弟同登第安
强官至侍御史尤有聲當時蔡京疾之例置黨籍中而
其名益著傳數世至鷗江先生先生以文行自高即能
濟高祖也二子方壺方谷當元盛時松竹田園之勝鄉
族罕比今能濟所居有所謂九成堂者方壺先生所構
百數十年矣而其堂尚存鄉之老人多能道曾氏盛時
事惜能濟不及見也今鄉之老者日少道其事者又寡
矣能濟去家而居於廬陵以耕讀自適其跡與世益疎

雖吾鄉之人少有知能濟者能濟亦惟恐人之知也數年來能濟又泛舟江湖與鄉之豪賈相往還以自匿於吳儂楚獠之間能濟誠欲深其所蓄而故爲是以自渾耶然能濟質甚美年甚富而好學不輟吾知其有以紹續乎其先世矣能濟尚慎自重毋使人得易傾其所蓄則幸矣遂書以序之

友筠軒詩序

廬陵蔡君學淵與其弟清源俱好寫竹俱從學於錢唐

高士諫先生先生亦寫竹頗清俊盡竹之態然好之甚篤自云其法得之顧定之定之得之李息齋之子遵道今息齋徒有譜傳之世世之工寫竹者猶宗師之況高先生所授遠有所自非徒玩其譜者則蔡君兄弟之所得可知矣予嘗以謂竹之榮枯燥濕形容意度譜有所不能盡者必其心自得之若非窮極精力不能自得也自高先生後往往見蔡君寫竹布列人家今其弟清源又題其軒曰友筠其用心益勤矣然蔡君今為吏部主事

清源又擢貢於禮部二人者皆孝友篤厚能文詞則非徒寫竹云耳清源之居家人求其竹者往往不已蔡君笑曰文與可所謂鞭材者今在吾第於乎人徒知其一藝也獨不知蔡君厚於德深於材可行於世而施於政者不在此也清源爲人清勁適拔甚有高趣既托於竹而又以友筠軒詩文一帖求余文序之因書此爲之序

送劉教諭序

廬陵劉君仲鐔舉於鄉而入太學選修永樂大典在禁

林者幾三年時學士解公與祭酒胡公總裁其事仲鐔
未嘗斯須去其側搜閱秘典遇奇事隱語即俾仲鐔錄
示館中之士或有所考索以上進者必仲鐔書之乃以
進否則不得書不以進也蓋仲鐔性穎敏又知所畏慎
他人勤者或不敏敏者又不能慎惟仲鐔敏而慎故學
士諸公皆賢仲鐔今年春羣試於禮部得選為沛縣教
諭同館之士多賦詩餞之翰林檢討解公文夫欲予一
言序其首夫沛漢高之舊里也方高帝平定四方威加

海內而還也與沛中父老子弟飲酣而歌大風之詩一時勁氣雄風何其壯哉然高帝是時徒欲得猛士耳豈高帝於此尤有慢乎儒生耶魯兩生之不至商四皓之遠引蓋以是然高帝過魯而祀孔子徵博士以起朝儀諸生稍稍向用則其所慢者獨酈生輩爾沛中父老子弟固亦知高帝之意哉抑習見其始未覩其終耶夫士之習俗繫上之意向今之沛非復漢之舊矣天下既向風文學而沛又得仲鐔者爲之師夫承時制作抱負問

學之高深者尤知賢仲鐔而謂沛中子弟使其見吾仲
鐔之學行溫雅必愛敬懽然傾竭矣因彼之甚慕而施
之教焉吾知其能有成必也是行也仲鐔其勉之予與
仲鐔處久而相好之篤因檢討君之屬也遂爲之序


送某知縣序

蜀之人純厚而易治信義道德非家習而人通之然其
好慕尊尚敬恭而樂道雖齊魯逢掖之士未必如蜀之
人也比聲律切對偶儒生末事而蜀人有終身不操觚

而握管者而聞人之誦詩書道文詞者則皆知賢之此
豈其性然哉習見之厚而化之深也爲令非得其民不
能有成而民有負詐挾姦好惡異乎天理之正者焉能
治之也故易治而化惟蜀之人爲然進士南康某以選
爲順慶大竹縣令大竹在巴蜀之東南四面皆大山無
舟車之往來使者行部終歲不一至其民尤朴而其習
尤醇以某抱負才藝擅進士之賢名而一旦臨乎其土
其民固已慕之矣民有慕乎其令之心則令之道必行

政必成道行而政成使人人知明經問學其治民如此
豈不深可喜哉吾往年教於蜀以文詞雕鏤之靡責之
於醇龐朴厚之人恨不得因其醇朴與之相忘於無事
徒以其不能者強聒之無益也然亦以好慕在此又上
之人所責成吾之職當如是故未嘗敢怠惜予未知所
以教教未久而去不見其成也今某是行迨與其民相
忘於無事之地也然烏知其民於今不化而爲才美文
藝之士耶因其好尚之實而啓其憤排之誠治而教之

亦令之道也以予嘗遊其地教之難而不能久去之久而不能忘也某之行南康縣令黃紹祖求予一言送之遂告之以此



泊菴集卷六